

आकाशवाणी जयपुर-अजमेर  
प्रादेशिक समाचार  
दिनांक 22.10.2024 समय 18.45

- राज्य सरकार अक्षय ऊर्जा हलका मांय संयुक्त अरब अमीरात रे साथे तीन लाख करोड़ रिप्या रो समझौतो करयो ।
- राष्ट्रपति द्रौपदी मुर्मू राष्ट्रीय जल पुरस्कार वितरित कर्या- ठावा स्कूल श्रेणी मांय सीकर रा सरकारी उच्च प्राथमिक स्कूल ने पेलो ईनाम मिल्यो ।
- प्रदेश री सात विधानसभा सीटां रा उपचुनाव सारू नामपाना भरण री प्रक्रिया चाले-आज चार नामपाना दाखिल ।
- बारां अर शाहपुरा जिला मांय व्ह्या इन्वेस्टर्स मीट मांय आज दो हजार करोड़ रिप्या ऊं बत्ती रा एमओयू व्ह्या ।

000

राज्य सरकार अक्षय ऊर्जा हलका मांय संयुक्त अरब अमीरात रे साथे तीन लाख करोड़ रिप्या रो समझौतो करयो है । मुख्यमंत्री भजनलाल शर्मा अर यूएई रा निदेश मंत्री मोहम्मद हसन अल सुवैदी री मौजूदगी मांय इण समझौता माथे हस्ताक्षर करी ज्या । ई निवेश ऊं आथूणी जिलां मांय 60 गीगावाट बूता री सोलर विंड अर हाइब्रिड परियोजना री थापना करी जाएला । मुख्यमंत्री कयो के यूएई रे साथे साझेदारी मांय लागू होवण वाळी ई परियोजना ऊं राजस्थान अक्षय ऊर्जा हलका मांय अगुआ राज्य बणेला । श्री शर्मा कयो के राज्य सरकार सार्वजनिक हलका रा उपक्रमां रे साथे 2 लाख 24 हजार करोड़ रिप्या रा एमओयू करया है । कोई 10 महीना रा कामकाज मांय 32 हजार मेगावॉट रा संयंत्र लगावण रा एमओयू हस्ताक्षर करी ज्या है । मुख्यमंत्री ई दौरान यूएई रा निदेश मंत्री ने आवता 9 ऊं 11 दिसम्बर ताई जयपुर मांय होवण वाळा राइजिंग राजस्थान ग्लोबल इन्वेस्टमेंट समिट सारू न्यौता है ।

000

ऊर्जा राज्यमंत्री हीरालाल नागर कयो है के भारत नवीकरणीय ऊर्जा ने बधावो दे र साल 2070 ताई शून्य कार्बन उत्सर्जन नेट जीरो रा लगस ने हासिल करण कानी आगे बध रियो है । वणा कयो के देश रो थापित नवीकरणीय ऊर्जा बूतो 200 गीगावाट ऊं बत्तो व्हे गयो है अर राजस्थान 29 दशमलव आठ पांच गीगावाट बूता रे साथे इण मांय सब ऊं बत्ती योगदान दे रियो है । श्री नागर आज जयपुर मांय साउथ एशियन क्लीन एनर्जी फोरम रा उद्घाटन सत्र मांय बोल रिया हा । श्री नागर कयो के क्लाइमेट चेंज ऊं पैदा चुनौतियां रो मजबूती ऊं मुकाबलो करण अर अक्षय ऊर्जा ताई लोगां री पहुंच तैय करण सारू भेळी कोशिश जरूरी है अर राजस्थान ई दिशा मांय उदाहरण पेश कर रियो है । वणा नेपाल, भूटान, श्रीलंका, मालदीव अर बांग्लादेश रा नुमाइंदा ने एक मंच माथे लावण सारू भारत मांय अमेरिका रा राजदूत एरिक गार्सेटी ने धन्यवाद दियो । इण ऊं पैला भारत मांय अमेरिका रा राजदूत कह्यो के दुनिया री एक-चौथाई आबादी अर दुनिया री अर्थव्यवस्था मांय 28 फीसदी भागीदारी राखण वाळा ई उपमहाद्वीप मांय क्लीन एनर्जी ने बधावो देवणो बगत री मांग है । वणा क्लाइमेट चेंज रे कारण पर्यावरण माथे बधता खतरा कानी ध्यान दिरायो ।

000

राष्ट्रपति द्रौपदी मुर्मू कयो है के सरकार जलजीवन मिशन रे तैत देश रा 78 फीसदी ऊं बत्ती गांवाई रेहवासा मांय टूटी ऊं पाणी रा कनेक्शन दीरी ज्या है । राष्ट्रपति आज नुवी दिल्ली मांय पांचवां राष्ट्रीय जल पुरस्कार वितरण जळसा मांय कयो के साल 2019 मांय जदे ई मिशन री सरुआत करीजी ही, उण फगत 17 फीसदी गांवाई घरां मांय साफ पाणी मिल रियो हो । राष्ट्रपति

बतायो के जल जीवन मिशन रे कारण गांवाई हलकां मांय रेहवण वाळा लोगां रा जीवन मांय महताऊ सुधार व्हयो है। वणा कयो के जल संरक्षण मांय राज्य सरकारां री भूमिका महताऊ है। राष्ट्रपति द्रौपदी मुर्मू देश रा भूमिगत पाणी रे कम होवण माथे चिंता जताई। आज दीरी ज्या ईनामां मांय ठावा राज्य री श्रेणी मांय पेहलो ईनाम ओडिशा ने दीरी ज्यो। ठावी स्कूल श्रेणी मांय राजस्थान मांय सीकर रा राजकीय उच्च प्राथमिक विद्यालय ने पैलो ईनाम दीरी ज्यो। आकाशवाणी ऊं बतळ मांय स्कूल रा प्रिन्सीपल हरिराम कुलहरी कयो के लारला एक साल मांय पाणी बचावण ने लेर घणा ई काम करी ज्या है।

000

देश मांय बीएसएनएल रो 4-जी नेटवर्क सुरू होवण रे पछे ग्राहकां री तादाद लारला छह महीना मांय 75 लाख ऊं बधने एक करोड 80 लाख व्हे गयी है। केंद्रीय संचार मंत्री ज्योतिरादित्य सिंधिया आज नुवी दिल्ली मांय बीएसएनएल रा नुवा लोगो अर सात नुवी सेवावां रो उद्घाटन करतां आ जाणकारी दी। श्री सिंधिया कयो के भारत दुनिया रा वां छह देशां मांय भेळो व्हे गयो है जठे आपरो 4-जी नेटवर्क विकसित करयो है अर बेगा ई इण ने 5-जी नेटवर्क मांय बदल्यो जाएला। बीएसएनएल रो नुवो लोगो विकास, पहुँच अर विश्वास रो प्रतीक है। श्री सिंधिया सात नुवी सेवावा री सुरूआत करी। आं मांय स्पैम-मुक्त नेटवर्क, राष्ट्रीय वाई-फाई रोमिंग, इंटरनेट फाइबर टीवी, एनी टाइम सिम कियोस्क, डायरेक्ट-टू-डिवाइस सेवा, सार्वजनिक सुरक्षा अर आपदा राहत अर खदानां मांय पेला निजी 5-जी नेटवर्क भेळो है।

.....

राज्य मांय विधानसभा सीटा रा उपचुनाव सारू नाम पाना भरण री प्रक्रिया चाल री है। चुणाव महकमा री वेबसाइट माथे अपलोड करीजी ताजा जानकारी मुजब आज चार विधानसभा हलकां मांय चार नामपाना भरी ज्या। आज दौसा, सलूमबर, चौरासी अर देवली-उनियारा विधानसभा सीट सारू एक-एक पर्चो भरी ज्यो। इण ने मिला र अजे तांई उपचुनाव सारू कुल पांच नामपाना दाखिल व्ह्या है। नामपाना 25 अक्टूबर तांई भर्या जा सकेला। नामपाना री जांच 28 अक्टूबर ने व्हेला अर नाम पाछा लेवण री आखिरी तारीख 30 अक्टूबर है। वोट 13 नवम्बर ने पडेला अर वोटों री गिणती ने 23 नवम्बर ने करी जावेला।

000

प्रदेश मांय विधानसभा उपचुनाव रे दौरान संबंधित चुणाव हलकां मांय आदर्श आचार संहिता री करडाई ऊं पालना करी जावे। साथे ई मतदान सारू प्रशासनिक तैयारियां ई जोरां ऊं चाले। सलूमबर मांय शांतिपूरण अर बिना डर से चुणाव सारू पुलिस पूरी सावचेती बरत री है। ठोड-ठोड नाकाबंदी करने जिला मांय आवण वाळा वाहनां री करडी जांच करी जावे। उठी ने दौसा मांय चुणाव ड्यूटी मांय लाग्या वाहन ऊं घणी तादाद मांय शराब जब्त करीजी है। दौसा री भांकरी पुलिस कने पुलिस संदेश रा आधार माथे ई वाहन री जांच करी। वाहन मांय 25 पेटी शराब बरामद हुई। देवली-उनियारा विधानसभा हलका मांय पुलिस अपराधियां री धरपकड सारू खास अभियान चलावे। इण मांय 85 लोगां ने पकडी ज्या है अर 93 मामला दर्ज करी ज्या। उपचुनाव वाळा विधानसभा हलकां मांय वोट देवण वाळां मांय जाग जगावण सारू केई तरह रा आयोजन व्हे रह्या है। सलूमबर रा सराडा कस्बा मांय रैली रो आयोजन व्हयो। मोहल्ला रिसाला अर पलटन ऊं मतदाता जागरूकता रैली निकली ज्यी अर रिसाला चौक माथे मतदाता जागरूकता रंगोली बणायी ज्यी।

000

प्रदेश मांय दिसम्बर महीना मांय होवण वाळा राइजिंग राजस्थान ग्लोबल इन्वेस्टमेंट समिट ऊं पैला न्यारा न्यारा जिलां मांय इन्वेस्टर मीट व्हे री है। बारां मांय आज व्ह्या ई कार्यक्रम मांय कोई 580 करोड़ रिप्या रा 46 एमओयू करी ज्या। ई दौरान कार्यक्रम मांय बोलता प्रभारी मंत्री ओटाराम देवासी कयो के राज्य सरकार रो लगस राजस्थान री अर्थव्यवस्था ने साढे तीन सौ मिलियन डॉलर तांई पूगावणो है। इण ई तरह शाहपुरा मांय व्ही इन्वेस्टर मीट मांय 75 एमओयू व्ह्या। इण री मार्फत कुल 1 हजार 435 करोड़ रिप्या रो निवेश व्हयो। प्रभारी मंत्री डॉ. मंजू बाघमार निवेशकां ऊं कह्यो के राज्य सरकार वां रा उद्योगां री थापना मांय हर होवण वाळी मदद करेला। डीग जिला मांय निवेश ने लुभावण सारू राईजिंग राजस्थान इन्वेस्टर मीट काले व्हेला। जिला कलेक्टर

उत्सव कौशल बतायो के समिट मांय पेला 109 करोड़ रिप्या ऊं बत्ती रा 16 एमओयू व्हे चुक्या है। इण ऊं चार सौ ऊं बत्ती लोगां ने रूजगार मिलेला। इण रे अलावा ई निवेश आवण री आस है। पाली जिला रो निवेशक सम्मेलन काले फालना मांय व्हेला। जिला कलेक्टर एल.एन. मंत्री ई मीट री तैयारियां रो जायजो लियो। काले होवण वाळी मीट रे दौरान निवेशकां ने लुभावण सारू वोकल फॉर लोकल नुमाइश ई व्हेला। चित्तौड़गढ़ मांय इन्वेस्टर मीट 24 अक्टूबर ने व्हेला। इण मांय 10 हजार करोड़ रिप्या रा एमओयू होवण रा आसार है।

000

जैसलमेर मांय राज्य पक्षी गोडावण ने बचावण सारू कर्या जा रिया जतन ने मोड़ी कामयाबी हासिल व्ही है। सम रा गोडावण ब्रीडिंग सेंटर मांय कृत्रिम गर्भाधान ऊं गोडावण रा एक चूंजा रो जनम व्हां है। जिला वन अधिकारी आशीष व्यास बतायो के गोडावण ने बचावण अर वां री तादाद मांय बढवार करण री कोशिश मांय आ अजे ताई री सब ऊं मोटी कामयाबी है। इण ऊं जंगलात प्रेमियां मांय खुशी री लहर है।

000

‘अमृत भारत स्टेशन’ योजना रे तैत जोधपुर मंडल रा 15 ठेसनां रो पुनर्विकास करयो जावे। आं मांय नागौर, नोखा, बाड़मेर, जालोर, मेड़ता रोड, डीडवाना, गोटन, सुजानगढ़, मारवाड़ भीनमाल, रामदेवरा, बालोतरा, रेन, फलोदी, डेगाना अर देशनोक रेलवे ठेशन भेळा है। आं कामां माथे कोई 272 करोड़ 84 लाख रिप्या री लागत आवेला। इण रे साथे ई मण्डल रा तीन ठेसनां जोधपुर, जैसलमेर अर पाली मारवाड़ रो मेगा रि-डेवलपमेंट रे तैत विकास करयो जावे। आं ठेसनां रा कामां री लागत 889 करोड़ रिप्या ऊं बत्ती है।

000

केंद्रीय पर्यटन मंत्री गजेंद्र सिंह शेखावत कयो है के साल 2029 ताई भेळो सैलाणी हलको 250 बिलियन ऊं बधने पांच सौ बिलियन डॉलर रो व्हे जाएला। पटना मांय एक सैलाणी मेळा मांय बोलता श्री शेखावत कयो के विदेशी अर घरू पर्यटन मांय घणी आस है। केंद्रीय मंत्री कयो के सैलाणी हलका मांय भारत री अर्थव्यवस्था रो विकास इंजन बणण रो बूतो है, कांकि ई हलका मांय तेजी ऊं विकास व्हे रह्यो है। श्री शेखावत सैलाणी हलका मांय लाम्बी बगत री अवसंरचना निवेश कोष मांय भेळा कर्या जावण सारू प्रधानमंत्री नरेन्द्र मोदी रो धन्यवाद कयो।

000